

scapis brevibus 1-2-cephalis præter 1-2 squamulas lineares nudis, pedunculis remote setulosis apice lineari-bracteolatis, capitulis medio-cribus, involucri phyllis infimis squamis pedunculi similibus lineari-setaceis, interioribus duplo longioribus linearibus acutis præter pubem farinaceam dorso parce glanduloso-setulosis, acheniis (junioribus) apice vix attenuatis ♀.

Hab. in regione alpinâ montium Volakia et Psiloriti Cretæ (Raulin!).

Folia 13-15 lineas longa 4-5 lata, scapi bipollicares, capitula submajora eis *C. divaricatae* et *Sibthorpiæ* a quibus foliis teneris non runcinatis, pedunculis non crassis, involucri phyllis angustioribus et acutioribus longe differt.

13. **C. macropus** (Boiss. et Heldr. Diagn. Ser. I, 11, p. 57) radice verticali, collo squamoso pluricipiti, caulibus glabriusculis a parte inferiore plus minus dichotomis rarius simplicibus 1-3-cephalis, foliis radicalibus arachnoideo-puberulis et ad costam interdum papillari-setosis ambitu oblongo-lanceolatis in petiolum attenuatis runcinato-pinnatipartitis segmentis lanceolatis acute dentatis, caulinis ad dichotomias anguste linearibus, capitulis majusculis longe pedunculatis, involucri farinoso-tomentosi cani phyllis adpressis imbricatis lanceolatis obtusiuscule acuminatis inferioribus brevioribus inæqualibus, receptaculo areolato denticulato, acheniis longiusculis apice subattenuatis pappo niveo ♀.

Hab. in collibus aridis Lycaoniæ ad occidentem urbis Koniah (Heldr!), Ciliâ Tracheâ in montibus Ermenek (Pér!), Galatiæ ad Angora (Wied!).

β. *Phrygia*. — Procerior. caules stricte ramosissimi, folia bipinnatipartita segmentis longioribus magis divisis. — *C. Phrygia* Boiss. in Bal. exs. 1857. — *C. incana* Led. Fl. Ross. II, p. 827! non Sibth.

Hab. in monte Bulghasdagh Phrygiæ 5400' (Bal!), Armeniâ Rossicâ ad fines Turcicas (Nordm!).

Formæ typicæ caules cum pedunculo 8-9 pollicares, varietatis sesquipedales foliis longioribus semipedalibus segmentis 9-10 lineas longis, pedunculi 6-9-pollicares, capitula eis *C. divaricatae* et *Sibthorpiæ* majora, flosculis et phyllis numerosioribus; ab eis præterea distincta phyllis inferioribus non uniseriatis et subæqualibus sed elongatis sensim ad intima transeuntibus.

14. **C. crocifolia** (Boiss. et Heldr. Diagn. Ser. I, 7, p. 14) glaberrima, radice crassâ verticali, collo cespitoso valde squamoso, caulibus numerosis tenuiter virgatis simplicibus vel a parte inferiori dichotome et parce ramosis 1-4-cephalis, foliis radicalibus numerosis glauco-cæsiis linearibus gramineis integris infimis subspathulatis obtusiusculis cæteris acutis, caulinis paucis brevibus, capitulis longe pedunculatis paucifloris obconicis, involucri nigricantis farinoso-puberuli phyllis paucis obtusiusculis flaccidis squamoso-subpatulis externis triplo brevioribus, receptaculo subdentato, acheniis obsolete striatis apice attenuatis pappo sordido brevioribus ♀.

Hab. in rupibus regionis alpinæ Taygeti Laconici locis Hagio Paraschevi et Choupata dictis (Heldr!), Fl. Jul. Aug.